

Aruba Way Foundation a haci donacion na Huize Maris Stella y Oral Health Foundation Aruba

TIN hopi fundacion na Aruba cu ta traha duro pa bin cu proyectonan nobo na bienestar di nan clientenan. Hopi biaha e fundacion tin e idea y e perseverancia pa sigui dilanti cu e proyecto, pero ta haci falta e fondonan necesario pa sigura cu e proyecto ta un exito. Aki ta unda Aruba Way Foundation ta yuda!

Aruba Way Foundation ta un fundacion cu ta yuda otro fundacionnan riba nos isla cu e parti financiero di un proyecto.

Despues di evalua cada proyecto cu drenta Aruba Way Foundation ta wak unda mas por yuda y e biaha aki a dicidi pa yuda dos fundacion cu proyecto nan importante pa nos comunidad.

E prome fundacion cu a ricibi un donacion ta SABA – Huize Maris Stella. Na Huize Maris Stella e team dinamico di cuida ta trahando un parke di recreacion caminda nos grandinan por cana, sinta y pasa un rato ameno.

Considerando cu un cantidad grandi di e clientenan di e centro ta cana cu poco dificultad mester pone railing full rond di e parke y mester traha un cura p'asina e grandinan por ta sigur.

E suma di Afl. 18.750 lo cubri e gastonan di e railing y tambe pa traha e cura.

E Director nobo di SABA, sr. Remo Kock y e lider di e proyecto sra. Marita Tjou Tam Sin a keda masha contento cu e donacion y ya caba sra. Marita a cuminsa cu ehecuracion di e proyecto!

Oral Health Foundation Aruba, un fundacion relativamente hoben, t'e di dos fundacion cu a ricibi e suma di Afl. 10.000 pa compra materialnan necesario pa haci e Build A Smile project un exito.

Nos muchanan mester wordo informa y educa tocante e manera adecua pa cuida nan djente.

E fundacion aki ta bishita nos scolnan primario p'asina educa e muchanan y como parti di e proyecto y danki n'e donacion di Aruba Way Foundation y otro partners cada mucha lo ricibi nan skeiro di djente cu e cap pa tene nan skeiro limpi.

Aruba Way Foundation ta contento di por yuda Huize Maris Stella y Oral Health Foundation Aruba cu dos proyecto asina importante y ta desea nan hopi exito!

